




GUACANAGARI	PONTIAC	BLACK HAWK
MONTEZUMA	CAPTAIN PIPE	KEOKUK
GUATIMOTZIN	LOGAN	SACAGAWEA
POWHATAN	CORNPLANTER	BENITO JUAREZ
POCAHONTAS	JOSEPH BRANT	MANGUS
SAMOSET	RED JACKET	COLORADAS
MASSASOIT	LITTLE TURTLE	LITTLE CROW
KING PHILIP	TECUMSEH	SITTING BULL
UNCAS	OSCEOLA	CHIEF JOSEPH
TEDYUSKUNG	SEQUOYA	GERONIMO
	SHABONEE	



TO PERPETUATE THE HISTORY  
AND DEVELOPMENT OF THE  
PEOPLE REPRESENTED BY THE  
ABOVE CHIEFS AND WISE MEN  
THIS COLLECTION HAS BEEN  
GATHERED BY THEIR FRIEND  
EDWARD EVERETT AYER

AND PRESENTED BY HIM  
TO  
THE NEWBERRY LIBRARY  
1911





~~150.5 - Mohawk~~

~~421~~

~~17814~~

~~B407pa~~

~~1836a~~

~~(K)~~



Hess & Wallace

NE YENOHATON

NE HOYATADOGENTH PAU

INOMKA NE

HERREWS

WILLIAM HESS

TEHAWANATENYON ONI SHOGWATAMEN NE

J. A. WILKES, JR.

NEW-YORK

PUBLISHED BY HOWE & BATES

FOR THE YOUNG MEN'S BIBLE SOCIETY OF NEW-YORK

AGENCY TO THE

BIBLE SOCIETY OF THE METHODIST EPISCOPAL CHURCH

1854



NE YEHOHYATON

NE ROYATADOGENHTI PAUL

JINONKA NE

HEBREWS,

WILLIAM HESS,

TEHAWEANATENNYON ONI SHOGWATAGWEN NE

J. A. WILKES, Jr.

---

NEW-YORK :

PUBLISHED BY HOWE & BATES,  
FOR THE YOUNG MEN'S BIBLE SOCIETY OF NEW-YORK.

AUXILIARY TO THE  
BIBLE SOCIETY OF THE METHODIST EPISCOPAL CHURCH.

---

1836.

89



*Jefferson*  
THE EPISTLE

OF

PAUL THE APOSTLE

TO THE

HEBREWS,

TRANSLATED INTO THE MOHAWK LANGUAGE,

BY WILLIAM HESS,

WITH CORRECTIONS BY

J. A. WILKES, Jr.

---

NEW-YORK:

PUBLISHED BY HOWE & BATES,  
FOR THE YOUNG MEN'S BIBLE SOCIETY OF NEW-YORK

AUXILIARY TO THE

BIBLE SOCIETY OF THE METHODIST EPISCOPAL CHURCH.

---

1836.



NE NE

P A U L

YEH HOGHYADONNYH NE ROYADADOKENGHDY

NE JI-NONKA

NE HEBREWS.

---

CHAPTER. I.

*Keristus ne ne oghnakenkeh nen-yenwaderighwihhewe ji-natentre tenthayenghdaghkwe ne Ranighnehhah.*

**N**IYOH, raonhha yutkade nokhony eso ji-nadekarihhodense jishakodatyase ne neh nentyuderihhonkoghdonh ne ro-nonhhakeh ne yethinihhokonkenhha *Prophet-neh* tyuyenghdaghkonh,

2 Ne ne ken-ikenh ne shiyeseweghniserakonde ne shonkwadatyaseh nonkyonhhakeh ne neh Royenhah, raonhha ony shakohhonkaryakonh ji-en-yurighwadatye ne orighwakwekonh, nokhony raonhha raonghwenjison ;

3 Raonhha wahhy ne deyuderonronde ne raonwesenghtsera, neony ne wathodinetstorarake ne kayadonnyh ne ne ronkweda, neony ne ayonkwarighwawakon orighwakwekonh ne raowenna ony ne raoshatstenghsera, ne o-nenh raonhha yadehhayadyh segshonkwanoohhahareseh nonkwarighwaneraaxhera, yeshotyen jiraweyendeghdaghkonh ne rasonkeh ne Rarighwakwadakwaghs ne e-nekenghjy ;

4 Ne neh senhha eso rayadanoron ji-niyugt ne karonghyakeghro-nonhokon, ne ne raonhha ronwarakwen-nyh dehhodentshon senhha eso roghsennaneghrakwah ji-niyugt ne ro-nonhha.

5 Ikenh ne ji-nonweh ne ji-nahhoden ne karonghya-keghro-non aenron ok thikawenniyu katkeh, Ise wahhy Kon-yenhah, kenghweghniserade Wakon-yadewedon ? Ne neh teke-nihhadond, t'kakonde raonhha Rake-nihhah enkenhhake, neony raonhha t'kakonde enhhakyyenhhake ?

6 Nokhare shekonh enskat, ne o-nenh shahhoyathewe ne ne tyutyerenghdonhrodewedon ne jiyonghwenjade, rawenh, t'kakonde akwekonh ne raoronghyakeghro-non ne Niyoh enhhonwarighwaneken raonhha.

7 Neony ne karonghyakeghro-non wahhenron, Raonhha roweyennendaonh ne raronghyakeghro-nonhokon kani-konghraokon, neony ne raojihhenghstaokon yudonghkode ne ojire.

8 Nok ne raonhhakeh ne Royenhah wahhenron, Sash-atstenghseradokenghdy, O Niyoh, ne na ne ji-niyenhhenwe neony ne ji-niyenhhenwe : ne en-yontsheronnyade ne aderighwakwarighsyonghtsera ne na watsheronnyadonh ne sayanertserakonh.

9 Se-noronghk'wa natdakwarighsyonghtsera, nok engh-tswenghseke ne sewaderighwadewaghdonh ; ne kady wahhonny ne Niyoh, shadenjawenne ne sa Niyoh, ne enghyayadoghkaghde nadonnharah atshennonnyaghtsera yenwadohhetste ne ji-nisewentyughkwa.

10 Nok, neh Ise, Sayaner, ne ne jityudaghsawe shon-daghsideron ne onghwenja ; nokhony ne karonghyakeh ne ji-nikayudenhonh Ise sesnonkeh :

11 T'kakonde enhhonghdon ; ne ok ne ise enjodadenre, neony ne ro-nonhha akwekonh t'kakonde yaodeghyagh-rontye yukayonhonhhatye ji-niyught ne kane-na ;

12 Neony ne ji-nenjatsheronnyaghkodenhhake ne t'kakonde nise adenhenrakonh en-yetshiyadinyonde ji-konwa-diderondaghk'wa ne deyudinakarondonhah, neony ne ro-nonhha t'kakonde denshontyadadeny : nok nise wahhy ne shakat, neony ne jisadoghserade-nyon t'kakonde yaghta-daondayesaweyennarighsy.

13 Nok neh ji-nonka ne karonghyakeghro-non enhhenron nokthikawenniyu katkeh, Sattyenh jikeweyendeghda-ghkonh, ji-nenwe enkeweyennendane ne yesaghswehghse denghshe, araghsidakenseraaghkwe ?



14 Wahhy ne ro-nonhha yahhakwekonh thadehhadigh-snye ne kanikonghraoken, kasheyadennyeghdas ne radiji-hhenghstajyh ne ne ro-nonhha t'kakonde ne enhhadirigh-waghserere ne adaghskatshera nyonnheonweh?

## CHAP. II.

*Aaghjhidewathondatshe-se ne Keristus Yesus.*

**N**E KADY WAHHONNY, yuweyenstonh ne senhha eso endidewennikonghrakonden endewadennikonraren ne ji-niyadekariwakeh ne ji-nahhoden yonkwathonde, onwaneken kaok nonweh nenkenhhatye denjonkwanyogh-sere.

2 Ikenh doka nowenna ne entyudadihhake ne karonghyakeghro-non yughnironh ki-naah jikaghson, neony ne jikongh nyakodewennontyonh ony yaghdeyakothondadonh en-yeye-na norighwiyu en-yekaryake ne en-yakorane jiniyuriwa

3 Oghnayawenne ne naonsedewanyakenne, doka dewadaghrontyenseh jiyukarowanenh nonkwatshennonnyaghtsera; ne neh ji-nahhoden jityutyerenghdonh jityudaghsawe shonkwadatyaseh ne Royaner, nokhony kaweyennendonh nonkyonhhakeh ne neh enhhonwathondeke;

4 Niyoh ony enghshakorighwaghniratshe, yadejaronh ne wade-nyendenghstanyon nokhony nyuneghrakwaghde-nyon, neony enke-ne en-yutkadeke nyutyanade-nyon, nokhony enghshakaon ne Ro-nikonghriyughstonh, ne entyuyanenhawe nakwah raonhha ji-nithanonwese?

5 Asekenh ne ro-nonhhakeh ne karonghyakeghro-non yaghden wahhy eghdeghshakoyadare ne onghwenja ne dawe, ne ji-nahhoden endewadady.

6 Ne ok enskat kanatdadokenh ji-endewaderihhodaghsy endewaderighwaghnirade, rawenh, Oghnahhoden naah nonkweh, ne neh ne aaghtshadennikonraren? nendenhens ne onkweh ronwayenhah, ne neh eghjhisewanadaghrenawy?

7 Ise eghjhadison senhha eghdakeh rodonkoghdagh-konh ji-niyught ne karonghyakeghro-non, ne eghtshen-nonghwaroronh ne onwesenghtsera nokhony ne yutkonny-enghst, neony eghnonweh nighjhideron ne denhharihkhon-koghde ne sayudenghsera ne sesnonkeh :

8 Orighwakwekonh eghtserighwakarenghrakwennyh dehhoraghsidakenseraghkwenh. Ikenh nese rorighwakeghronnyh orighwakwekonh ne enhhaderighwenhhawa, yahhothe-non dehhorighwenseh ne yaghtaorighwakeghronny. Nok nonwa shekonh arekho thayakwatthaghtthonaonwarighwakeghronhaghse norighwakwekonh.

9 Nok waghshakwatthaghtthon ne Yesus, raonhha senhha eghdakeh wahhadohhetstaghkwe ji-niyught ne yeronghyakeghro-non ikenh ne roronghyakenhonh ne kennheyon, ronwennonghwaroronh ne onwesenghtsera nokhony nyutkonnyenghst; ne neh ne aarihhonny ne raodenrat ne Niyoh eghdehhodonkoghdonh kennheyatneh ne neh akwekouh nonkweh akoriwa.

10 Ikenh ne ji-nityawenhonh ne raonhha, wahhy raonhha orighwakwekonh, orighwakwekonh raonhha rotyenawaghstonh, yawedowanenh seghshakoyathehhatye ne ronwadiyenhokonhah ne ne desho-nadonnhadene nyonh onwesenghtserakonh, ne ne aonwayadaneghrakwaghde ne neh rao-nadaghskatshera ne nyonnheonweh kaweyennen-daonh aoriwa raoronghyakenghsera.

11 Yenhhodikwekde ne ne ensninikonghradokenghdine nokhony ne ro-nonhha onghka ne enje-nikonghradokenghdine akwekonh enskat yekenh: ikenh ne aoriwa yaghwahhy dehhadehhenghse ne ne aaghshako-nadonghkwe kewadadekenhah,

12 Wahhenron, Enkerihhowanaghde ne saghsenna jionka nonkwadadekenhah, shadekanonghshenh nononghsadokenghdy Denkeriwaghkwe enkonnenndon nisekeh.

13 Nokhare shekonh, Enhhiyadewennodaghkon ne raonhhatserakonh. Nokhare shekonh, Wakka-en-yon ne exhaokon ne ji-nahhoden ne Niyoh rakwawyh.

14 Ne neken aoriwa ethone ne exhaokonhah wahhy yakoyadaraonh ne owaghronneh neony ne o-nekwenghsa, raonhha kady ony shadeyawenhonh royadaraonh ne shakat ; ne neh dehhodonkoghdonh kenhheyatneh ne ne aontyesen aoghdonde ne ne roshatstenghserayen ne kenhheyon, ne wahhy, ne o-neghshonghro-non ;

15 Neony seghshakoyadakwenh ro-nonhha ne kaghderonghxherakonh ne kenhheyon ne neh akwekonh ne jinihho-nonnheghs radinerenh ne rodiwenniyu.

16 Ikenh akwah na orighwiyuonweh yaghe thadehho ghkwenh ne ji-niyeyadodenh ne karonghyakeghro-non ; nok ne dehhoghkwenh ne raoghnekwaghsa ne Akwerenh.

17 Ne kady wahhonny orighwakwekonh ky eghjhidewanoronghk'wak ne endewaghsa shaden-yughdon ne ro-nonhakeh ne rondadekenhah, ne neh aondon aonsaghshonkwendenre neony aondayonkweghdaghkon ne e-nekenghjy rajihhenghstowanenh ne karighwaokon onkwayadakenhaghsera ne Niyoh-neh, ne nase aonsonderighwaghseronny ne onkweh akorighwaneraaxhera.

18 Ikenh ne neken raonhha yadehhayadyh roronghyakenhonh ne wathodennakerade, (ne wahhetken.) raonhha wahhy rokwe-nyatserayen ne neh enseghshakaourisharako ne ne deyakodennakeraghdonh wahhetken. (yakoye-nah.)

---

### CHAP. III.

*Keristus senhha ne royadaneghrakwah e-nekenh rodohhets-taghkwenh ji-niyught ne Oses :*

**N**E WAHHONNY, sewayadadokenghdy dewadadekenhah ; aonsedewayadarane ne karonghyakeh daondaghshonkwaronghyenhare, dejadoreh ne Raderighwaghnodonghskowah Royadadokenghdikowah nokhony Enekenghjy Rajihhenghstajighkowah ; ne e-neh seghshonkyonnyennyh, Keristus Yesus ;

2 Onghka ne thaweghdaghkonh ne raonhhakeh ne neh rohonnkaryakonh, ji-niyught ony n'Oses thaweghdaghkonh ony akwekonh ne rao-nonghsa. (raononghsadokenghdy.)

3 Ikenh ne neh ken-ikenh ronkweh wagheradonh karonh jiroyadaneghrakwah jiyukarowanenh ne raonwesenghtsera senhha ne ji-niyugt ne Oses, rokaen-yonghkwenthonh jiro-konghsison senhha ese yutkonnyenghst ne ji-niyugt ne kanonghsa.

4 Ikenh ji-niyadekanonghsakeh ji ok onkweghshonhah yako-nonghsison; nok ne raonhha ne ji-nihhoghsen orighwakwekonh ne na ne Niyoh.

5 Neony Oses akwah na tokenghske thaweghdaghkonh ony rao-nonghsakwekonh, ne rao-nhatsera, ikenh ne yurighwaghniratstonh ne ken-ikenh karighwaokon ne nahhoden ne kenh shonkwadatyaseh ne oghnaken;

6 Nok Keristus ji-niyugt ne royenah nakwah raonhha jiro-nonghsode; onghka ao-nonghsa nonkyonhha, doka en-yonkwatye-nawaghstonh ne yunyahhesat nokhony ne ayonkwadonnharake ne karharatsheriuh waorighwadaty ne jiyeyuderihhokde.

7 Ne wakarihhonny (ne Ro-nikonghriyughstonh rawenh, Kenghweghniserade doka ensewaronke ne raowenna.

8 Toghsa sadaderyaghsaghuirat, ne kanakhwenghtserakonh, ne eghniserakonh ne dewadadennakeraghdonkeh ne karhakonh:

9 Ne o-nenh ne yetshinihhahhokon waonkwadennakeraghde, waonkwade-nyenden, nokhony waontkaghtho nakyudenghsera kayeryh niyughseraghshenh.

10 Ne wakarihhonny Wake-nikonghranonwax ne neken yeghnekwaghsade, neony wakenh, Tyutkonh rodiyadaghdonhonhhatyese ne rao-neryaghsakonh neony yaghd-ehhadiyenderyh nakhahhaokon.

11 Ne wakhonny yurighwaxde Wakadadyh ake-nakhwenghtserakonh, Yaghthaondaweyade nakwadorishenghtserakonh.)

12 Jadennikonrarenh, dewadadekenhah, onwa neken kaneka ne ji-nijonh ne weryaghsahhetken ne nyaghthadetyaweghdaghkonh ne ne erenh yakawe-nonghdonh ne ji-nonka ne ronnheonweh ne Niyoh.

13 Nok dejadatrejaronhhek denghnon niyadeweghni-serakeh, shekonh wahhy sanakdode tyesaronghyenhha Kenwende; onwa neken kaneka ne ji-nijonh yen-yughnirha ne enkarihhonny ne kayadaghdonghtsera ne karighwaneren



14 Ikenh wahhy skaweyennendaonh eghjidewayadare-ghkwenh Keristus ne, doka enyonkwatye-nawaghston ne jityudaghsawe ne endewanyahhesen ne en-yonkwaye-nawakonhonweh ne jiyeyuderihhokde ;

15 Yurighwadatyeh shekonh jirawenh, Kenwende doka ensewaronke ne raowenna, toghsa sadaderyaghsaghnirat, ne ne kanakhwenghtserakonh.

16 Ikenh ottyake, ne o-nenh shahhonronke dahhodighswaden : nok yalhakwekonh ne ok dekenh ne jithoyakenhonh ne *Egypt* ne *Oses*.

17 Ok yehhokwekdonh ne jonhha jiro-nikonghraronghyakenhonh kayeryh niyughseraghshenh ? yaghkenh ne dehhonneskwe ne neh rodirighwaneren, ro-nonhharaodiyerondakenhha yeyukeghrondaonh etho karhakonh ?

18 Neony ro-nonhhakeh rodewennaghniradonh ne ne yaghtaondaweyade ne raodorishenghtserakonh, ne neh ro-nonhhakeh ne yaghdetho-neghdaghkonh ?

19 Ne kady waakwatthagtho ne ne ro-nonhha jiyaghtaondaweyade enkarihonny jiyaghdethoneghdaghkonh.

---

## CHAP. IV.

*Ne yen-yondorishen ne yakorighwiuyughstonh yejakoh wahhy dejakodentshon jideweghdaghkonh.*

**N**E kady waghonny yonkwaghderonse, onwa neken, ne shonkwarharatstennyh enjidewadewaghde ne naedewadaweyade ne raodorishenghtserakonh, doka kaneka ne ji-nijonh ne ji-niyught naondayakoseronnenghthake.

2 Ikenh onkyonhhakeh wahhy ne orighwadokenghdy yonkhiyaderighwaghnodonny, ok wahhy shadeyught ne ro-nonhhakeh : nok ne nowenna jiyonkhiyaderighwaghnodonny yaghdehho-nadonghradaghkwenh, ne neh jiyaghthiyadeyunatyeghstonh ne teweghdaghkonh ne ro-nonhha-tserakonh ne ne shihho-nathonde.

3 Ikenh nonkyonhha ne ne tyonkweghdaghkonh ende-wadaweyade nadorishenghtserakonh, ase ne rawenh, ji-niyugt Wakewennaghnironh ake-nakwenghtserakonh, doka senhha ok aondaweyade nakwadorishenghtserakonh : etho nenne t'kayudenhonh eghtkaweyennendaonh ne jity-udonghwenjadaghsawe.

4 Ikenh rodadyh ji-nonweh nakwah orighwiyu ne neh jadaghkhadont niweghniserakehhadont ka ok nikariware, Neony Niyoh egghnyehhodorishen ne jadaghkhadont niweghniserakehhadont ne akwekonh ne raoyudenghsera.

5 Nokhare shekonh ne ne kenghnonweh, doka nonkenh senhha ok enhhondaweyade nakwadorishenghtserakonh.

6 Ne waghonny deskanerah sanikonghrayendan ne ne ottyake yudadenronh ne t'kakonde en-yondaweyade ne etho, neony ro-nonhhakeh ne ne tyutyerenghdonh ronwanaderighwaghnodonyh yaghdehho-nadaweyadonh aoriwa ne jiyaghdetho-neghdaghkonh

7 Nokhare shekonh, raonhha rodatnerenh waghniseradokenh riyennyh ne Dawed, Kenwende, o-nenh kariwes ji-nahhe, ji-niyugt wahhy wakenh, Kenwende doka ensewaronke ne raowenna, toghsa sewadaderyaghsaghnirat.

8 Ikenh doka ne Yesus enghshakodorishenghtserawy, yaghky na noghnakenkeh thaonsahhodadike ne thiweghniserade.

9 Ne kady waghonny yudadenronh naah ne ethoh nakodorishenghtsera ne raonkweda ne Niyoh.

10 Ikenh raonhha ne neh rodaweyadonh ne raodorishenghtserakonh, raonhha ky ony na waghodokthaghsenakwah yadehhayadyh raoyudenghsera, ji-niyawenhonh ne Niyoh deyudaonh ne raoyudenghsera.)

11 Ne kady waghonny o-nenh yonkwayudenh ne naedewadaweyade ne ethoh adorishenghtserakonh, onwane-ken onghka ok ne onkweh ehhenyerrhye-nenghdaghkwe en-yerighwaghsera ne shadayawenne ne ayondadenna-keraghde nyaghdetyakweghdaghkonh.

12 Ikenh ne raowenna ne Niyoh kayadaghsnore naah, nokhony kashatstenghserananonh, nokhony senhha yughyuthiye ji-niyught ne neh thade jaronghkonh thadeyughyuthiye nasharekowah, shaden-yawenne ne en-yakodawayaden thentyako-nonghdonse ne ji-nonka denjakokhaghsy erenh nadenskyadon ne adonnhets ony kanikonra, neony ne ji-nadeyonkwaghsthonderon ony ji-niyonkwaghstaghronwat, (ji-nadeyudinenawakhon,) neony ne ayekenhheke ne en-nonghdonnyonghtsera neony ji-niyekahhaghs ne kanikonra.

13 Yaghden ony oghthaoryudoden nyahhokkennonweh thakenhhake ne jidehhakanere: nok orighwakwekonh wahhy onkwayadoskon neony skonkwanhodonkwennyh ne jinonka ne raokara ne neh raonhha ji-nenghjhideshowat-  
yerase.

14 Jatkaghtthoh se-nikaen-yonh denghnon ne ne yonkwayen ne rakowanenh e-nekenghjy rajihhenghstowanenh, ne wahhy neh dehhodonkoghdonh ne karonghyakonh, Yesus ne Royenhah ne Niyoh, nenkady dewatye-nawaghst ne tyonkwaronghyenhha: yonkwawennendaonh.

15 Ikenh yaghwahhy deyonkwayen ne e-nekenghjy rajihhenghstowanenh ne nejiyaghdeyaweght eghnayawen ne kenniyaaghshonkwayere ne nyaedewatdokaghseke ne jiyonkwanikonghkenhheyonh onkwayadanetskhah; nok se orighwakwekonh jiyutnyonwaradonnyon deyonkwaden-nakeraghtha ji-niyught jieghnidewayadodenh, shekonh yaghnekarighwaneren.

16 Ne kady wahhonny o-nenh dewadetshanight ehhi-deweght ji-nonka ne orighwiyu tyutkonnyenghst ne kendenron, ne neh aontyesen ne daonsewadentsha ne naon-saghshonkwendenre, neony aonsedewatshenry ne kendenron ne neh ayonkwayadake-nha ne ji-naden-yonkwadonhharenron.

## CHAP. V.

*Ne neh rokwe-nyatserayen nokhony yutkonnyenghs ne ne seghshonkwayadakwenh rajihhenghstakwe-niyu.*

**I**KENH ji-nikonh no e-nekenh ne radijihhenghstajyh kentyughkwakonh onkweghneht'karakwenh ne ronwahlonkaryakonh ne onkwehhokon ne karighwaokon ehhakareghkwen Niyoh-neh, ne neh ne ashakotyense ashakorharatsten ne ashakaon dejaronh neony aonsakenhheye aonsonghdon ne karighwaneren :

2 Ongghka ayekweny aonsayondadidenre daonsayakononghyanike ne ne tyakokaraonh yaghdeyondaderihhonyennyh, neony ne ro-nonhhakeh ne neh ro-nathahharakwaghdonh ; ikenh wahhy raonhha yadehhayadyh ony ne dehhotyadadon ne royadakenhheyatha.

3 Neony ne aaderyendayendonwe kenghyaondaghsawen ken-ikenh eghnaayere, onkweh akowengghk, eghkady ony ne yadehhayadyh, ne neh enhharyu ne karighwane-raaxhera.

4 Neony yahhongghka ne onkweh thaaye-na ne ken-ikenh yutkonnyenghst ne nyadaayadihhake, ne ok ne raonhha ne no entho-nonke ne Niyoh, ji-niyawenhonh ne Aronh.

5 Eghkady ony niyught ne Keristus jionwesenghtsera yutkonnyenghtsera yaghthiyadehhayadyh ne ne eghnakaweyennendaonh ne e-nekenghjy rajihhenghstowanenh ; nok raonhha ne ne rawenh ne raonhhakeh, I-se wahhy Konyenhah, kenwende Wakon-yadewedon.

6 Ne ne ji-nihhoyerenh ony ne thiskade ji-nonweh, I-se wahhy ne sjihhenghstowanenh ne ji-niyenhhenwe ne enghserighwaghssere ne ji-niyeyuderighwinonh ne *Melchisedec*.



7 Onghka eghyeyadare ne jiweghniserade-nyon ne raowaghronneh, ne o-nenh shiyahhareke ne raoderennay-enght neony waghennidenghde wahhorighwaneken nak-wah yushatste kashatstenghsera wathohhenreghe wathaghshenthon raokaghserakonh ne raonhhakeh ne ne rokwe-nyatserayen ne naonsahhoyadako ne kenhheyatneh, neony ronwathonde ne kaghderonghsherakonh ;

8 Ethosane raonhha Royenhah, shekonh ky wahhorih-honnyen wahhothondatshe ne ne karighwaokon ne ji-nah-hoden roronghyakendaghkwenh ;

9 Neony akwah sahhoweyennendase, eghnonsahhaya-dodenne ne sondaghsawen donsahhadentsha ne ji-niyenhenwe nyaghthiyeyodokde adaghskatschera ne neh ro-nonhhakeh akwekonh ne neh ronwathondadyh ;

10 Ronwanadonghkwennh ne Niyoh ne e-nekenghjy Rajihhenghstowanenh ne rarighwaghsera ne jiniyeyuderighwinonh ne *Melchisedec*.

11 Eso yonkwariwayen ji-nayakwenron ne raonhhakeh, nok kanoronghs ne nayakwadady, se-nikaen-yonh wahhy deyonkwatyokdonh ne jiyonkwathonde.

12 Ikenh ne o-nenh yakayerine ne nayetshirihhonnyennihheke, desadonghwenjonyh ne ne shekonh enskat aonsayesarihhonnyen ne ne jiaontyerenghde jikayadakweniyu ne ne ji-nihhatstha ne tekarihwakehhadond ne Niyoh ; neony anen-yawen ji-neken niyught ne deyakodonghwenjonyh ne o-nonda, nok yaghdn ne yukwaghni-ronh.

13 Asekenh akwekonh ji-nikonh ne neh ne yontha nononda ne ne yaghtadekawistoghserakenseronh ne nowennakonh ne aderighwakwarighsyonke : ne na ne raonhha nowiraah

14 Nok ne ne yuk'waghniironh ne na ne rao-nawenghk ne neh nenro-noghserayeridonh, shadenyawenne ne thoi-kenh aoriwa ji-ne ro-natstonh ne ji-nihhodinikonra ne dehho-nadade-nikonrhare naodinikonghrayendane aontkaghtho dejaronh ne yuyanere nokhony ne wahhetken.

## CHAP. VI.

*Ne waghshakoghrejaron ne ne toghsa daondahhodighswade-  
ny ne jideweghdaghkonh.*

**N**E wahhonny sewatyese sewanikonrhenghse ne kay-  
adakwe-niyu karighwakwe-niyuse ne raorighwakeh  
ne Keristus, nenkady yonkwaghdentyonhhatyeh ji-nonka  
ne naedewaweyennendane toghsa shekonh ok thakayen-  
datyeseke ne tyuderighwakenseraghkwenh ne adatrew-  
aghdon ji-nonka ne kenhheyon kayudenghsera, nok neh  
teweghdaghkonh Niyoh-neh wahhy,

2 Ne ne aorighwakeh ne adatnekoserhon neony dengh-  
shako-nisnonghsaren, neony ne enseghshakoketsko ne  
kenhheyatneh, neony ne ji-niyenhenwe jienghshonkwaj-  
enhhayen.

3 Neony ne ken-ikenh ne t'kakonde eghnendewayere,  
doka ne Niyoh shekonh aonsaghshonkwanakdothaghse  
daondaghshonkwaghtkawen.

4 Asekenh wahhy thikanoronghjionh ne neh ken-ikenh  
ottyake ne neh nendekoghsawatheonne, ne neh nen-yak-  
otdokenh ne karonghyakeh t'kayen nadadawyh, neony  
nenskaweyennendaonh eghjeyadareghkwenh ne Ro-nik-  
onghriyughstonh-neh,

5 Neony nen-yakotdokenh yako-nhondaonh ne raow-  
ennadokenghdy ne Niyoh, neony ne kashatstenghserao-  
kon ne jiyonghwenjade enwawe,

6 Dokat ro-nonhha enshodiyadonneke ne neh ase sahho-  
nadonse are ji-nonka ne adatrewaghdon, jatthaghtoh jade-  
ryendaran ro-nonhha yadehhadiyadyh ase donsahhonway-  
endanharen ne Royenhah ne Niyoh, neony eghyahhoyat-  
hewe, ne wahho-nade-nhodonkwaghse wadehhenghsero-  
wanenh.

7 Ikenh ne jiyonghwenjade ne yako-nyadanawenghtha  
yeghnekirha okennoraghserakonh ne ne yutkade yudihha-  
tye dayughraonhhatye, neony ne en-yaweghyaron ne oh-  
hondeshonhah ne en-yakoyeritshe en-yakokwadakwen en-  
yeyenaghseke kayadaderightsera Niyoh-neh entkayengh-  
daghkwe;

8 Nok ne neh kenkayen ne deyeghsnye yerighwenh-hawe nohhikda ony oghnyonwar ne na nyakoderighwade-kwenh, ne na nenniyoreah ne ji-nonka nadewendeghtsera dewadonnhakaryenh; eghyen-yakodokthaghsen jienwatsha.

9 Nok, kwanoronghk'wa, yonkwaghsteronwy ne senhha karighwiuse ne ise, neony karighwaokon ne ne enskatneb aedeweseke adaghskatsherakonh, ethosane ne neken kwa-datyase.

10 Ikenh ne Niyoh yaghden na ne yaghtaoderighwak-warighsyonh ne nao-nikonrhen ne sayudenghsera nokhony jisadaderonghyakendonh ne jieghtsenoronghk'wa, ne ne yesadadodaghsyonh ji-nonka ne raoghsenna, ne ne degh-sheghsnyeonh ne ne rodiyadadokenghdy nokhony eghnis-ayerenh ne radijihhenghstajyh.

11 Neony dekwadonghwenjonyh ne ne niyadejonh jadadodaghsyh ne shakat jatste-nyaronh ne ji-nonweh t'kan-anonh ne kadokehghjionh orighwiyu ne karharatsheriyyuh ne jiyeyüderihhokde.

12 Ne neh toghsa aaghsendorhake, ok denghnon ne sheghnonderatyeseke onghna ne deyakorihhghghseronh ne teweghdaghkonn nokhony yakonikonghkatste yakoyenda-onh ne karharatstonh.

13 Asekenh ne o-nenh ne Niyoh shahhorharatsten ne Akwerenh, wahhy raonhha yughnironh rodadyh jirorharatstonh yaghdeyaweght ne senhha akarihhowanen, raonhha yadehhayadyh yurighwaxde rodadyh jirorharatstonh,

14 Wahhenron, Orighwiyu kayadaderightsera Enky-uwesaghde nise, neony dentyawedowanhaghssereok Enkon-yatkadade nise.

15 Neony eghniyawenhonh, oghnakenkeh nenshiyathorighwayendase wathaghsnye-ne waghaderighwenhhawa, raonhha wahhy ne donsahhadentsha ne karharatstonh.

16 Ikenh akwah tokenghske yurighwaghnironh shakodatyaseh ne onkwehhokon ne jiyurihhowanen: neony ne dekanonghronghkwanyon ne neh nensewaderighwakwadakwaghs ne nao-naderihhokthaghsen ne akwekonh aondah-hadirighwareke aondatsteronghse.

17 Kanikariware ne Niyoh, ranonwese ne senhha eso aonsahho-nadonse aonsahho-natkadatshe ne ne aaghshak-odinadonhaghse ne jiwakaghwajiradatye ne karharatstonh ne ne yaghthiyadaonsontdeny ne raoyadoreghdaghxhera raojenhhayenghtsera, kaweyennendaonh dekanonghrong-hkwanyonghkwenh :

18 Ne neh ken-ikenh tekenyh yaghthadaonsonderigh-wadeny, ne ne ji-nahhoden yaghdeyurharats ne naennow-enghde ne Niyoh, ne naontyesen ayonkwashatstenghsera-yendane naedewanikonghrayewendane ayonkyonrishendane, onghka konwadekwennyh ne nayakoyadake-nhaonh jideyuderyentharah ne neh ne ayakotye-nawaghston ne ji-nonka ne karharatsheriyyuh onkwahhendonh shonkwakeghronnyh :

19 Ne neken karharatsheriyyuh nense ji-niyught nakar-istohhon ne ne kanikonra, shadeyurighwiyu nokhony kadokenghjionh kaweyennendaonh, neony ne ji-nahhoden yakotyennyb ne yakoderhorokdonh ;

20 Kendenhens kayen ne neh ohhendonh yonkhirigh-wadadyh iih shonkwayadorenhonh, shadeyawenhonh ne Yesus, t'kaweyennendaonh ne e-nekenghjy ne rajihhenghstowanen ne ji-niyenhhenwe ne oghnakenkeh nenshaghshakorighwakeghronhaghse ne *Melchisedec*.

---

## CHAP. VII.

*Keristus Yesus ne na ne rajihhenghstowanen ne oghnaken-keh nenshaghshakorighwakeghronhaghse ne Melchisedec.*

**I**KENH ne ken-ikenh ne *Melchisedec*, koraghkowah ne *Salem*, rajihhenghstowanen ne neh e-nekenghjy Niyoh, onghka watyaderane n'Akwerenh dondahhayenghdaghkwe ji-nonka ne dahhonwanawentho ne koraghkowatshon, neony waghoyadaderighste ;



2 Raonhhakeh ony n'Akwerenh yehhoghtkane oyerihhadond ne ji-nikonh royen ne akwekonh; tyutyerenghdonh ne neh jirodewennakaradadonh ne atdakwarighsyonghtsera ne koraghkowah, neony ne oghnakenkeh shatyawen ne koraghkowah ne *Salem*, ne na neh koraghkowah ne kayanerenh;

3 Yaghdehho-nighshen, yaghdehho-nistenghshen, yahhony kaneka detyughsharonde, yahhony ne jityudaghsawe ne jiweghniserade-nyon yahhony thiyeyutde ne jironnhe; nok kenniyught jironwayadison ji-niyught ne Niyoh Royenhah; yeshodorishen yeshenderon ne Rajihhenghstowanen ne jiwaorighwadatyeeonweh.

4 Nonwa dejadoreght anyoh rakowanen ne ken-ikenh ronkweh, raonhhakeh shaden-yawen ne rodinighshen Akwerenh yehhoghtkawen ne oyerihhadond ne ne yuhhetkenseron.

5 Neony akwah orighwiyu ro-nonhha ne neh shakoyenhokonah ne *Levi*, raonhha wahhy roye-nah ne enhhad-erihhonden ne ne ji-niyakonnhoden ne ejihhenghstajyh, aodiyendane ne Niyoh raorighwakeh ne aodiyendane ne noyerihhadond jidenwadekhaghsonko ne onkwehhokon ne entyuyanenhhawe ne orighwakeh, wahhy kenh, ne ne rondadekenhah, ethosane nenne eghtho-naderakwenh ne ne thihhoghdeghkarawenghdeah ne Akwerenh:

6 Nok ne raonhha ne neh yaghwahhy dehhonwaghroryh ne ro-nonhhakeh aondayuyenghdaghkwen jirodiye-nah ne oyerihhadond deyudekhaghsonkwenh ne Akwerenh, nok ronwayadaderighstonh ne ne royen ne karharatstonh.

7 Neony ne yaghdewakwekonh deyakoderighwatyeronghkwenh ne ky niyurighwaah yondatyadaderighstonh ne ne aonsayuyanerenne.

8 Neony kenthoh jonkweh ne ne kenniyurighwaah yakoye-nah ne oyerihhadond jideyudekhaghsonkwenh; nok etho nonweh nighshakoye-nah, raonhha wahhy rorighwaghniradonh ne ne ronnheonweh.

9 Neony ne naontyesen ne nakadady, ony *Levi*, raonhha wahhaye-na ne oyerihhadond ji-niyuriwa jideyudekhaghsonh, waghakaryake ne oyerihhadond ji-niyuriwa deyudekhaghsonh raonhhatserakon Akwerenh.

10 Ikenh raonhha na shekonh ranihhakda (raoghdegh-karakonh,) ne ro-nihhah, ne o-nenh *Melchisedec* shatyaderane.

11 Doka ne waghonny yadaonsakarighwayendane aonsondeyennendane ne neh egheyyadareghkwenh rajihhenghstowanenh, (*Levites.*) (ikenh nense entyakonongh-donhaghse ne onkwehhokon yakoye-nah ne aghtyawenraghtsera,) oghnakhoden senhha issy nonweh yadeyudonghwenjohhonh ne neh ethoh nonweh ne ne shekonh oya rajihhenghstajyh ne neh ne daondonderighwaketsko ne daondayuanenhhawe ne ji-nikaweyennendaonh ne *Melchisedec*, neony yaghkenh ne dehhonwanadonghkwennh ne oghnakenkeh ne ji-nikaweyennendaonh ne Aronh?

12 Ikenh wahhy ne rajihhenghstowanenh ji-nighronnhodenh ne dejtode-nyonh, kense wahhy kaweyenneodaonh ne daonsontdeny ony ne aghtyawenraghtsera.

13 Ikenh onghkakiok enkenhake ne ken-ikenh karighwaakon yonkhiyadyaseh ne akowenghk akoyadake-nhaghtsera ne oya wakaghnekwaghsadaty, ne neh yahhonghka nonkweh deyondawyh wakonwarighwaghronwase ne jiyeyadaraghstha.

14 Ikenh wahhy thiyuderighwakwathonh ne ne Eghjhidewayaner eghtyudonnionh ne *Juda*; ne ne oghnekwaghsa ne Oses yahhothe-non dehhodadyh ne ji-niyutyerenh ne rajihhenghstowanenh.

15 Neony shekonh wahhy inonh senhha nokthaonderighwakwatho: ne akarihhonny ne ayerighwaghssere ne shadaronnhodenne ne *Melchisedec* ne eghdaonderighwaketsko ne shekonh oya ne rajihhenghstajighkowah,

16 Onghka naah yakoghson, yaghne thakonwaghnonderatyeghde ne ji-niyurihhodenh ne owaghronneh, ok denghnon ne akonwaghnonderatyeghde ne kashatstenghsere ne neh yaghnonwendonh thiyeyodokde ayakonnhekeonweh.

17 Ikenh raonhha enhharighwaghnirade, I-se wahhy ne rajihhenghstajighkowah ne ji-niyenhenwe ne enhharighwaghssere ne ji-nikaweyennendaonh ne *Melchisedec*.

18 Ikenh akwah na orighwiyuonweh ne nyaghdeyakonanonh ne aghtyawenraghtsera yuderighwaghdeentyonh onkwahhendonh aoriwa ne ne onkwayadanetskhah neony yahhothe-non thiyadayurihhondane nethoh.

19 Asekenh naghtyawenraghtsera yahhothe-non deka-  
weyennendaonh, nok ne jakoyathehhatye ne ne ji-nonweh  
ne senhha t'karharatsheriyuh eghniyakoyerenh; ne neh  
thoah aedewatkwide Niyoh-neh.

20 Neony ji-nondaweghde yaghkaneka detyuderihhokde  
jiorighwiyu jiyurihhowanenh jikaweyennenjirajihhengh-  
stowanenh:

21 (Ikenh ne ken-ikenh otyake ne radijihhenghstajigh-  
kowatshon ne neh yahheghdetkaweyennendaonh jityurigh-  
wiyu jityurihhowanenh, nok ne kenkayen ne norighwiyu  
jityurihhowanenh ne raonhhakeh ne ne ronwennyh, Ne  
Royaner yughnironh rodadyh neony yaghtaonsayondat-  
rewaghde, I-se wahhy ne rajihhenghstowanenh ne ji-niy-  
enhenwe ne en-yerighwaghsera ne ji-nikaweyennendaonh  
ne *Melchisedec* :)

22 Eghniyuriwa na ne Yesus jironwaweyennendaseh  
ne norighwiyu ne senhha yuweyenstonh jiase dekawen-  
nendaonh.

23 Neony ro-nonhha wahhy rodityughkowanenh ro-nat-  
kade ne radijihhenghstajighkowatshon, asekenh wahhy  
ro-nonhha yaghtyutkonh ne dehhodironghyakendaghk-  
wenh ne akarihthonny ne kenhheyon;

24 Nok neh ken-ikenh ronkweh, asekenh ne raonhha  
waorighwadatyeeonweh, ne ne yaghthiyadaontdeny. jirajih-  
henghstajighkowah ne ji-niyenhenwe.

25 Ne kady wahhonny raonhha naah rokwe-nyatsera-  
yen ony ne ne aonsaghshakoyadako ne ro-nonhha ne ji-  
nonka tyurihhowanenh ne ne enwawe Niyoh-neh nonka  
ne raonhhakeh, aejatkaghtho raonhha ji-nahhe shighron-  
nhe shithoweyennendaonh shideghshakoderennayennyh  
ne ro-nonhha.

26 Ikenh ji-neken niyught ne ne e-nekenghjy ne rajih-  
henghstajighkowah eghnen-yawen nonkyonhha, onghka  
akoyadadokenghdy, jakoyanere jakorighwiyughstonh, ya-  
ghthadejo-non-yanight, dejo-nadekhaghshyonh ne karigh-  
waneraaxhera, neony kaweyennendaonh senhha e-nekenh  
ji-niyught ne karonghyakeh;

27 Onghka ne yaghthadeyakodonghwenjonyh ne niyadeweghniserakeh, ji-niyugt ne ken-ikenh radijihhenghstajighkowatshon, yaonsayondadaghtkawe aonwenneyon, (ne Niyoh,) tyutyerenghdonh ne nakwah raonhha raorighwanaaxhera, neony ethone ne neh onkwehhokon akoriwa : ikenh ne ken-ikenh eghnihhoyerenh enskat roderatstonh, ne o-nenh shiyahhadadaghtkawe ne yadehhayadyh.

28 Ikenh ne naghtyawenraghtsera ne rodijihhenghstowanaghtha ne onkwehhokon ne ne yakoyen ako-nikonghranetskhah tyako-nikonghrenhonh ; nok ne nowenna ne nyughnironh, (*oath*) ne neh nenji-nahhe ne aghtyawenraghtsera, thoweyennendaonh ne Royenhah, raonhha naah rorighwakanonnyh ne ji-niyenhhenwe.

---

## CHAP. VIII.

**N**ONWA ne neken karighwaokon ne ji-nahhoden wawkwadyase ne na ne ken-ikenh waghratsheraghkwenthonh karoronh : eghniyugt jiyonkwayen ne e-nekenh ne rajihhhenghstowanen raonhha naah yeshenderon jiraweyendeghdaglikonh ne rasnonkeh ne rao-nitskwaghraghxheradokenghdikeh ne neh rarighwakwe-niyu ne karonghyakeghtserakonh ;

2 Ne neh rajihhenghstajyh ne jitkanakdadokenghdyy, neony ne ne tokenghskeonweh jiwaghskwahhere, ne nahhoden ne Royaner thenderon rokanonnyh, neony yahhonkweh eghdeyakoyerenh.

3 Ikenh ne ji-nikonh ne e-nekenh ne radijihhenghstajyh ne na kahhonkaryakonh ne neh karighwadadonh yondadawyh neony aonwaneyon : ne wahhonny ne wahhy deyudonghwenjohhonh ne ne ken-ikenh ronkweh aoyendane ji ok nayuriwagske ony ne ne karighwadadonh.

4 Ikneh doka ne raonhha onghwenjakeh enkenhhake, yaghky na rajihhenghstajyh thakenhhake, aejatkaghtho wahhy ne neh rajihhenghstajighkowah ne ne ronwawyh ne karighwadadonh tyuyanenhah ne ji-nonka natdakwarighsyonhtsera :



5 Ongbka yuyudenhonh ne ji-nonka ne wade-nyendenghstaghkwenh neony yudaghsadare ne karonghyakeh karighwaakon, ji-niyugt ne Oses wahhy shihhodeweyen-nonnyenny ne Niyoh ne i-nenh raonhha shihhaghskwagh-rane; na aoriwa, yajatkaghthoh, radon, ne ne aaghsonny orighwakwekonh ne aodayuyanenhawe ji-nonka ne wade-nyendenghstaghkwenh ne yesanadonnyh ne jiyunonde.

6 Nok nonwa raonhha deshadientshaaghs senhha eso yuneghrakwah neony jiyudaghseghdonh ne yaghdeyokent, do-onghdeh nikonh ony ne raonhha na neh Keristus yenwadohhetste senhha eso yuyanere jidensnirihhonden, ne ne ji-nahhoden t'karighwakensseraghkwenh e-nekenh enwatraghkwe yenwadohhetste senhha eso yuyanere jikarharatstonh.

7 Ikenh doka ne ne jityutyerenghdonh nense kaweyen-nendaonh, ethone nen-yaghkaneka dejoj-nakdode ne ne ayakesaxheke ne ne teke-nihhadont.

8 Ikenh wahhonwadirighwaghsten ne ro-nonhha, radon, Se-nikaen-yonh ne ne weghniserade-nyon dawe, radon ne Royaner, ne o-nenh t'kakonde ase Denjide-nirihhonden ne ne rao-nonghsa ne *Israel* nokhony ne raononghsa ne *Judah*:

9 Yaghe thaondayuyanenhawe ne ne ji-nityawenhonh Shadonsayakwarihhonden ne yetshinihahhokon eghniserakonh ne o-nenh Shondakhe-nontsha ne naakheyaghsharine aonsakheyadinekenwe ne jiwadonghwenjade ne *Egypt*; ro-nonhha raodiriwa ne neh jiyaghtyutkonh thadeyonkwarihhonde, ne wahhonny Yaghtadekheghsnyehonh, radon ne Royaner.

10 Ikenh ne eh ne ken-ikenh ne denjide-nirihhonden ne ne I-ih entkennonghdon enskeweyennendane enke-ne ne rao-nonghsa ne *Israel* oghnakenkeh ne jiweghniserade-nyon, radon ne Royaner; I-ih t'kakonde eghyenkyen nakwatdakwarighsyonghtsera raodinikonrakonh, neony enkyadon ne rao-neryaghsakonh: nokhony ro-nonhha raodi-Niyoh enkenhhake ne I-ih, nokhony ne ro-nonhha t'kakonde iih akonkweda enkenhhake:

11 Neony ne ro-nonhha toghsa ne yaghtayetshirihhon-nyennireh ji-niyadeyakonh ne sewennonghsanekhahhon, neony ne ji-niyadeyakonh ne radadekenhah, wahhenron, eghjhise-niyenderhan ne Royaner: ikenh akwekonh t'kakonde en-yonkyenderhane, ahhendewadaghsawen ne jiye-yurighwaghsthoonh ony ji-nonka yeyurihhowanhaonh.

12 Ikenh t'kakonde Ensekhedenre ne yaghdeyakoderighwakwarighsyonh, neony ne raodirighwaneraaxhera ony ne jiyakorighwayadaghdonhonh yaghshekonh ne Thaonsakeghyarane (o-nenh eghyutde.)

13 Eghnihhoyerenh, Ne nase denjide-nirihhonden, ne neh jithoweyennendaonh ne tyutyerenghdonh onkayonne. Nonwa ne ji-nahhoden sondakenhheyeonweh nokhony onkayonneonweh nenkaweyennendaonh watsheronnyaghkwenthonh ne neh yaghtaonsaghtkaghtho i-nonh wadijaderade.

## CHAP. IX.

**E**THOGHKEH akwah tokenghske ne tyutyerenghdonh densnirihhonden ne neh ji-niyeyuderighwinonh ne atdakwarighsyonghtsera ne karighwiuyughstaghk konwayudenghse neony ne ji-tyonghwenjadokenghdy.

2 Ikenh etho naah waghskwahhere kaweyennendaonh; ne ne tyutyerenghdonh, kenghnonweh ne na ne yehhokadodaghk'wa, neony ne adek'warah, neony ne o-nadarakenghdy; ne ne konwanadonghkwenh kanakdadokenghdy.

3 Nok ne ne oghnakenkeh ne teke-nihhadond jikaghrenhhonh, ne jiwaghskwahhere ne ne konwanadonghkwenh ne nakwekonh e-nekenh yudohhe-tstaghkwenh jikanakdadokenghdy,

4 Ne neh rahhawe ne oji-nekwar karistanoron censer, neony ne yeghnekaraghk'wa ne ne dewennontshondaghkwenh yudawenghradonh thadeyughkwa dasedonh watstonh ne oji-nekwar karistanoron, ji-nonweh nikayen ne oji-nokwaroskon dekaghshi-nondon ondah ne ne karaghkwenh ne manna, (kak'wa koronghyakeh,) neony Aronh raodennits ne ne thikade jienjo-nhaghdondane, neony ne adek'warah ne ne dewen nontshondaghkwenh;

5 Neony wadohhetstane ne *cherubims* ne onwesenght-sera ro-nadaghsadaranyh ne kendenron-ennitskwarah ; ne neh yaghtayakwakweny nonwa ayakwadady nakwah ya-yakwayerithon.

6 Nonwa ne o-nenh ken-ikenh karighwaakon nense kahhonkaryakonh, radijihhenghstajyh tyutkonh ro-naghdentyonhhatye ji-nonweh ne tyutyerenghdonh niwaghskwahhere, ne rodiweyennendaonhhatye rodinaghnnonhhatye ne ronwayudenghse ne Niyoh.

7 Nok ne neh teke-nihhadond ne ne rajihhenghstowan-enh ennhaghdendy yadenhhoyadighste enskat ne ji-niyadeyughserakeh, toghsa ne yaghtakanekwenghsarake, ne ne yahhadadaghtkawe ne nyadehhayadyh, neony ne aoriwa ne jiyakorighwayadaghdonhonh ne onkwehhokon :

8 Ne Ro-nikonghriyughstonh ken-ikenh ji-nikendon, ne ne ji-niyeyuderighwinonh ji-nonkadyh ne neh e-nekenh yudohhetstaghkwenh jiorighwadokenghdy arekho shikaweyennendaonh noktlakawathon, ji-nikariwes ji-niyught ne jityutyerenghjiwaghskwahhere ne ji-shekonh ikade :

9 Ne neh kayanadonh ne waghratsstha ne ne ethone o-nenh yenwaderighwihhewe, ne neh eghnayawen jiwaghtkawen dejaronh ne adadawyh neony aonwenneyon, ne ne yaghdeyudonhonh ne raonhha eghnaoyeren ne ne aoyudenhonh aoweyennendaonh, ne ne ehhaonsahhayadarane eryendakonh ;

10 Ne neh ne ok yedaghkwenh yakoyadaghnirhats-tonh jideyontskaon nokhony yeghnekirha, neony en-yutkadeke enskanohhare, neony ne ji-niyurihhoden nowaghronneh jikarighwadadonh kaweyennendaonh, enhhonwadighwishade ne ro-nonhhakeh ji-niyore nen-yenwaderighwihhewe ne jiyadensewatdeny.

11 Nok Keristus e-nekenghjy thoyenghdaghkwenh rajihhenghstajighkowah ne ne karighwiuse ne aondawe, ne ne senhha yurihhowanenh senhha eso daonderihhoghsere aondeweyennendane ne ji-waghskwahhere, yahhosnonghsa dewadonh ne jikaghson, ne nayairon, yaghnedekenh ne ken-ikenh kanonghsonnyanyon ;

12 Yabhony ne dekenh ne o-nekwenghsa ne kayadak-eraghse yabhony ne niyakaah ne deyunhonskwaronh, nok se akwah raonhha yadehhadyh rao-nekwenghsa eghrodaweyadonh dehhoderatstonh ji-nonweh nikanakdadok-enghdy, ne deshodontshon ne ji-niyenhhenwe yaghthiyeyodokde ne shoghninondaghkwenh ne raoronghyakenghsera segshonkwayadakwenh nonkyonhha.

13 Ikenh doka nonkenh ne o-nekwenghsa akenhhake ne ne deyonkwanihaghrodonghs (anakare) dokaony kayadakeraghse, neony ne oghselhara ne nityuyenbah ne deyunhonskwaronde ne dayakotstaradonko ne nyuhhetkenhonh, aonsaya koyadadokenghdighste aonsayakokwadako aonsayakoderakewase ne wahhetken ne owaghronneh :

14 Do-onghdeh nikonh senhha eso ne t'kakonde ne rao-nekwenghsa ne Keristus, raonhha rorihhonny ne ji-niyenhhenwe yaghthiyeyodokde ne Kanikonra rodadewendeghdonh yadehhayadyh yahhothe-non deskaghyadonkwenh akahhonjighston ne Niyohneh; sasadade-nikonghrakwadakoh seiyendakonh erenh dondaseh ne ji-nonka ne kenhheyon kayudenghsera ne neh aaghtsyudenghse ne neh ronnhonweh Niyoh?

15 Ikenh kenwahhy kayen aoriwa ji-akwah raonhha shonkwayadake-nhaonh ne ne ase dekawennendaonh, ne ne ji-nonweh niyudaraekon ne kenhheyon, ikenh ne shoghninondaghkwenh ne raoronghyakenghsera segshonkwayadakwenh ne ne jonkwaderighwadewaghdonh ne neh ji-o-nakonh ne tyutyerenghdonh ne dekawennendaonh kaghyadonghseradokenghdy, ro-nonhha wahhy ne ronwadinadonghkwonh ne nayudonhonh aodiye-nake ne karharatstonh ne ji-niyenhhenwe yaghthiyeyodokde adaghskatshera tyonghwenjadeonweh.

16 Ikenh kanaanonweh ne orighwiyu dekawennendaonh naah, t'kakonde onghdeh ony deyudonghwenjohhonh neghnayawen ne kenhheyon jienjaihheye en-yewennendane jien-yondatkarenghrakwen.

17 Ikenh ne kawennendaonh yonkhikarenghrakwennyh ne na entyako-nonghdonse ne yakoghnonderatyese ne onkwehhokon wahhy yakowendaonh : doka thenkadeke yaghky na dekaashatste ne ne akwekonh ji-nikariwes ne nyonkhiwennendaseh yonkhikarenghrakwennyh ne nyonnhonweh.



18 Kaonghdeh nikariware yakhony ne tyutyerenghrehdonh kawennendaonh yonkhikarenghrakwenny ne jiy-aghdekanekwenghsare.

19 Ikenh ne o-nenh ne Oses nenshaghshakodatyase ji-nikonh shakorighwawyh ne akwekonh ne onkwehhokon ne dayuyanenhhaweh ne atdakwarighsyonghtsera, watrag-hkwe ne o-nekwenghsa ne niyakaah ne deyunhonskwar-onde neony ne kayadakeraghse, wathayeghste oghneka-noghs, nok jodakonghkowah o-nonghwerhon deyudinakarondonhah, ony yeyenthoghtha, (*hyssop*,) neony watthatstaradonkwaghde dejaronh ne kaghyadonghsera, nokhony akwekonh ne onkwehhokon,

20 Wahhenron, ne neken ne ken-ikenh ne o-nekwenghsa ne neh kawennendaonh ne neh Niyoh wathanikonryake waghjhisewenhaghse ne isekeh.

21 Senhha issy-nonweh wathatstaradonkwaghde o-nekwenghsa warade dejaronh ne ji-waghskwahhere, nokhony akwekonh ne keghrashonhah ne ne jiyutyanadonh.

22 Neony thoah ne ji-niyadekariwakeh ne neh ji-niwenyeh ne enskarakewe, enwatston ne o-nekwenghsa; neony ne yaghthao-nekwenghsaghrioh yaghky na tha-onsayakotnerenghsyon jikaronghyakenhonh.

23 Ne kady wahhonny ji-nikonh deyudonghwenjohhonh ne neh ne aonde-nyendenghstaghkwen ne karighwaokon ne karonghyakonh ne aonsakarakewaghde ne ken-ikenh; nok ne karonghyakonh ji-nityutyerenh ne karighwaokon yadehhadiyadyh ro-natstonh senhha ayuweyenston jiaonwaneyon ji-neken niyught.

24 Ikenh ne Keristus yahheghdehhodaweyadonh ji-nonweh ne nikanakdadokenghdy ne ne osnonghsa aondon jiaakaghson, ne nahhoden jikayanadonh ne waghratstha ne neh ji-tokenghskeonweh; nok ne karonghyakonh thiyaonhhaah, nonwa ne ne waghjhidewatkaghtso ne Niyoh aoriwa ne onkyonhha :

25 Yakhony shekonh ne raonhha nayutkadeke nyaadadaghtkawe nyadehhayadyh, ji-niyught ne rajihhenghstowanenh rodaweyadonh ji-nonweh ne nikanakdadokenghdy ji-niyadeyughserakeh rotstonhhatye ne o-nekwenghsa ne thiyedeshon ;

26 Ethone kady t'kakonde yutkade roronghyakenhonh ne ne ji-nahhe shondondonghwenjadaghsawen : nok non-wa enskat ne neh jiyeyudonghwenjokde eghwahhadodaghsy ne ne erenh aonsahhahhawighde ne karighwaneren ne naonwenneyon aonwarighwaneken nakwah yadehhayadyh.

27 Neony wahhy kaweyennendaonh ne onkwehhokonkeh ne ne ji-enskat jienjaihheye, nok ne oghnakenkeh ne ken-ikenh ne jiden-yondatyadoreghde kaghderonghtserakonh :

28 Eghkady naawen ne Keristus enskat rodadewendeghdonh ne ne aadaghkatstade yawedowanenh ne karighwaneraaxhera ; neony ne ro-nonhhakeh ne ne ronwayadisax, neony t'kakonde enseghshakododaghsyen ne teke-nihhadond ne jiyenwaderighwihhewe yaghthenskadeke ne karighwaneren den-yendonkoghdeonweh jiyuderighwawaneren yen-yonwe ji-nonweh ne adaghskatsherakonh.

---

## CHAP. X.

*Ne jioyadanetskhah ne atdakwarighsyonghtsera ne jironwane-yonghs jironwarighwanekenny.*

**I**KENH ne atdakwarighsyonghtsera yudaghsadaranyh ne karighwiyuse ne aondawe, nok yaghten nenne ne kayadonnyh nakarihhodense, ne nyaghtonwendonh thiya-kakweny ne ken-ikenh aonwenneyonghkwe aonwarighwaneken ne ji-nahhoden yehhodireh ji-niyadeyughserakeh yurighwadaty e aaghsonne akonnawe ne neh ken-ikenh aonsakaweyennendane.

2 Ikenh ethone denghnon ne ne yaghtaonsahhonghtkawe eghyenshondadaghtkawaghseke ? aoriwa ne neh ne ronwarighwanekennighs ne ne aonsahhoderakewase ne neh yaghshekonh thaonsahho-tyenhaghse ne eryenda ne karighwaneraaxhera.

3 Nok ne ne ken-ikenh jironwenneyonghs ronwarighwanekenny ne shekonh ayakeghyarake jonny ne karighwaneraaxhera ji-niyadeyughserakeh.

4 Ikenh yaghwahhy eghdeyawenhonh ne neh ne no-nekwenghsa ne ne deyonkwanihhaghrodonghs ne nanakere nokhony ne kayadakeraghse nekenh erenh enskahhawighde ne karighwaneraaxhera,

5 Ne kady waghonny ne o-nenh sharawe ne jiyonghwenjade, rawenh, toghsa aonsaghjhisewenneyon ony eghyaonsejadadaghtkawe, nok ne noyeronda dakwaweyennendaseh :

6 Jiojistakeh sewatyese eghjhisewenneyonghs aoriwa ne karighwaneren yahhothe-non thaejonwesaghde.

7 Ethone Wakiron, Jatkaghthoh, Yahhakewe (ne kaghyadonghserakonh kaghyadon wahhy ne iih,) ne neh eghnenkyere ji-nideghse-nonwese O Niyoh.

8 Senhha e-nekenh ne o-nenh shahhenron eghjhise-ni-neyonghs ony ne yese-nireh nokhony ojistakeh jatyese neony ne yese-nireh ne karighwaneren, ayawen yaghta-ejathondade, yakhony othe-non ony thaejonwesaghde ne eghnonweh ; ne neh jiyonkhikeghronnyh ne atdakwarighsyonghtsera ; (ne *law* ;)

9 Ethone wahhenron, Jatkaghthoh, Wakewe ne neh eghnenkyere ne ji-nideghse-nonwese, O Niyoh. Raonhha tyutyerenghdonh erenh enhhahhawighde, ne neh raonhha aontyesen aaweyennendane ne teke-nihhadond.

10 Ne neh ji-nabhoden ne t'kakonde enjonkwarighwi-yughstaghkwen enjonkwayadadokenghdighste ne enkarihonny ji-nethoreh ne raoyeronda ne Yesus Keristus enskat jiyedewakwekonh.

11 Neony akwekonh ne radijihhenghstajyh ro-naderighwaghdeyadonh niyadeweghnerakeh ne dehhadighsnyetyese neony ne waghodighrehhatye yutkade ne shakat ojistakeh ro-natyese ronwenneyonghs, ne neh yaghnonwendonh thakakweny erenh akahhawighde ne karighwaneraaxhera :

12 Nok ne ken-ikenh ronkweh, nok ne neh oghnakenkeh nenshiyehhoreh enskat rodadewendeghdonh aoriwa ne karighwaneraaxhera, ji-niyenhhenwe eghyonsahhatyen jiraweyendeghdaghkonn ne rasnonkeh ne Niyoh ;

13 Kenghyenwadaghsawen enjorharatstane ji-nenwe ne ne ronwaghswenghse denghshakoraghsidakenseraghkwe.

14 Ikenh enskat wahhy jirodadewendeghdonh shoyeri-donh showeyennendaonh ne ji-niyenhhenwe ne ne ro-non-hha wahhy saghshakoyadadokenghdighste.

15 Ne neken wahhy ony ne Ro-nikonghriyughstonh shonkwarighwaghniradyh nonkyonhhakeh : ikenh ne ogh-nakenkeh ne ne ji-nahhoden rawenh thodadyh,

16 Ne neken ne ken-ikenh ne dendewarihonden ne ne t'kakonde I-ih enkheyonny ne enhhonneseke oghnaken-keh ne jiweghniserade-nyon, radon ne Royaner I-ih t'ka-konde yenkyen nakwatdakwakwarighsyonghtsera naghty-awenraghtsera rao-neryaghsakonh, ony rao-nennonghdon-nyonghtserakonh t'kakonde Enkheghyadonse ;

17 Neony ne raodirighwaneraaxhera nokhony ne ji-nihhodirighwayadaghdonghseron yaghnnonwendonh ne she-konh Thiyaonsakeghyarane.

18 Nonwa kanonweh nayakorighwaghsthoghden ne neh ken-ikenh, yaghkaneka deskade ne shekonh ayakode-righwaeghsten akarihohonny ne karighwaneren.

19 Ne kady wahhonny sewaye-nah sewatye-nawaghst, dewadadekenhokonhah, sewadakaridek ne ne ji-enjadaw-eyade ji-nonweh ne royadadokenghdikowah ne rao-nek-wenghsa ne Yesuſ.

20 Ne neh ji-non-nase nokhony ne ne yonnheonweh nohhahha, ne ne raonhha seghshonkwarighwaghseronn-yennyh, ne wakarihohonny ne karhorokdonh, ne nayairon, raowaronh ;

21 Neony yakoyendaonh ne e-nekenh rajihhenghstowa-nenh enthennonghdon ne rao-nonghsa ne Niyoh ;

22 Kinyoh thoah dewatkwit ne neh tokenghskeonweh nonkwadonnhets ne akananon ne orighwiyu ne teweghdaghkonh, yonkwayendaonh nonkweryaneh deyutstaradonko-onh tyuyenghdaghkonh ji-nonka ne wahhetken neryenda-neony nonkwayeronda ne aonsayonkwade-nohhareden ne oghnekadokenghdy.

23 Kinyoh dewatye-nawaghst toghsa dejonkwanyogh-ser ne tyonkwaronghyenhha nonkwawenghk ne teweghdaghkonh yaghtshadeyonkwanikonrakeh ; (asekenh wahhy thaweghdaghkonh ne neh shonkwarharatstennyh,)



24 Kinyoh dedewayadoreght akwah yadeyonkwanenghrokdenh enskatshon endewaderade ne neh aedewanakonny ne ji-nonka nadade-noronh nokhony ne ji-nonkadyh ne kayudenghseriyuse :

25 Yaghtayakwaghtkawe ji-enskatneh yakwatkennisa-ags nonkyonhhashon, ji-niyugt notyakeshon ji-nikarih-hodenh ji-niyakoyerenh ; nok denghnon dejadatrejaronh-hek ji-niyadejonh : neony senhha en-yawedowannha, (eso) jiaejatkaghtho ne eghnisera karo dayawe-nonghdonhha-tye.

26 Ikenh doka aonsedewarighwanerake akwah thaedeweghde aedewennikonghronny ne neh nense yonkwaye-nah norighwiyu ne neh tokenghskeonweh, o-nenh ky na yahhothe-non dejodadenronh naonwaneyon (ne Niyoh) akarihhonny ne karighwaneren,

27 Nok kadokenghjionh ne kaghderonghtserakonh ne dehhatdaghkonyonghk'wa resax ne neh ji-naden-yondatyadoreghde nadewendeghtsera neony jityudarihhenh kan-akhwenghtsera dewadonnhakaryenh, ne wahhy t'kakonde enwadek'wise enwaghdonde ne neh deyesanihhaghrodonghs yesaghwenghse. *A*

28 Raonhha ne ne rarighwaghswenghse ne Oses raoghtyawenraghtsera yaghna kendenratneh tharenhheyade tekenyh nendenhens aghsenh jienwaderighwaghnirade :

29 Do onghdeh niyo-nonghwakde dewaderyendakaryenh karonghyakenghsera, dokat nonna jonhha, t'kakonde eghnenhhoyadawen neghniho-nikonghrodenh onghka kiok denhhonwaraghsidakenseraaghkwen ne Royenhah ne Niyoh, neony waghtratheraghkwenthonh ne o-nekwenghsa ne ne jidesewarihonde, wahhy raonhha ronwayadadokenghdighstonh, ne ne yaghdeyuderighwakwarighsyonh naorihhoden, neony ayakokenghradanihheke ne Kanikonghrakeh ne kendenron ?

30 Ikenh shakwayenderyh raonhha ne ne rawenh, iih akeronghyakenghsera, Ke-nonwese nenkkaryake, radon ne Royaner. Nokhare ne ne tekenihhadont jiyenwaderighwihhewe, Ne neh Royaner t'kakonde ne denghshakoyadoreghde ne raonkweda.

31 Ne nekenhenh ne kagderonghxherakonh nakarihho-den ne ne eghhen-yerye-nenghdaghkwe ne rasnönkeh ne ne ronnheonweh ne Niyoh.

32 Nok seronghyenhhahhek ne ne aaghseghyaraké ne enwadeghniserohhetstanyon, ne ji-nahhoden, sewesax ne daonsesewaghswathene, ne naesewayadake-nha ne jiwad-eriyughserowanenh ne karonghyakenghsera ;

33 Otyake, ji-nahhe eghshadesewakanere ne ok neh sewaneghrakwaghs sewarighwayesaghtha yekakwe-konh ne yaghdeskade ne kendenron nokhony ne ka-ronghyakenghsera ; nokhony Otyake, ne ne ji-nikariwes shesewentyughkwah sonдон ne ro-nonhha neeh wahhy se-sewayendane sesewaye-na.

34 Ikenh wahhy seghskwendenron niih ne jikenaghsk-wakenghne, neony wakye-na nadonnharah wakatsheennon-ny ne akwaghk'wanyon kayese aondon ne sewadaghkwen-nya, akwah jaderyendarak nyadesewayadighshon ne jon-hhatserakonh ne ne sewayen ne karonghyakonh ne ne senhha dekarenghsaron nokhony ne nyaghnnonwendonh thiyaonkayonne waorighwadatyeeonweh orighwiyu. (jika-yadonde.)

35 Ne wakhony toghsa erenh sathawighdas ne se-ny-ahhesenh, ne nahhoden wahhy yukarowanenh ensatyerit-she ne karharatstonh.

36 Ikenh wahhy ne desewadonghwenjonyh ne naesewa-nikonghkatsteke, ne neken, ne oghnakenkeh nenshadise-warihhoghssere eghshesewayere ne ji-nithanonwese ne Ni-yoh, ne naondon aesewaye-na ne ji-nikarharatstonh.

37 Nok shekonh niyurighweshah, neony raonhha ne ne t'kakonde entre t'kakonde itreh, neony toghsa tho-nis-koh.

38 Nonwa ne norighwiyu endewaderighwayeride t'ka-konde en-yakonnheke ne jideweghdaghkonh : nok doka kaneka ne onkweh dentyontswadeny, yahhothe-non thaon-konwesaghde nake-nikonra ne raonhhatserakonh.

39 Nok yaghden nonkyonhha eghdeyakwayadodenh de-tyonkwadonnonh ne ji-nonkadyh ne kayadaghdonghtshra atkaronnyat ; wahhy niih ne ne ne tyonkweghdaghk-wenh ne ji-nonka ne enshayadako ne adonnhets.

## CHAP. XI.

*Ne ji-nikayadodenh ne teweghdaghkonh.*

**N**ONWA ne teweghdaghkonh ne neh ne ji-nikayada ne karighwaokon ne ji-nadeyudonghwenjohhonh, ne ji-nikarighwagniradonh ne karighwaokon yaghdeyokent.

2 Ikenh wahhy ro-nonhhakeh ne thodixdenhah desho-nadentshon ne karighwiuh.

3 Ne wakarihonnny ne teweghdaghkonh ne waonkwanikonghrayendane ne neh jiyonghwenjade ne wahhy dekaghnerenghstonh deyunadatye-nawakhon ne raowenna ne Niyoh ne kady nethoh ne karighwaokon ji-nahhoden ne neh yokent yaghne dekaghsenhennyh ne karighwaokon ji-nahhoden ne nayokendon.

4 Ne jithaweghdaghkonh ne *Abel* ne yehhoreh rorighwanekenny ne Niyohne senhha eso yadeyutkenyonyon jiro-neyonghs rorighwanekenny ne Niyoh ne ji-niyught ne *Cain*, ne neh ji-nahhoden ne raonhha deshidentshaaghs yuderighwaghneradonhhatye ne neh raonhha thorighwayery roderighwakwarighsyonh, Niyoh rorighwagniradyh ne jironwawyh : nokhony ne jirawenhheyonh shekonh sane shodadyh.

5 Ne jithaweghdaghkonh ne *Enoch* ne kady erenh ronwawhawighdonh ne neh yaghthaaken ne kenhheyon ; neony yaghdehhotshenryonh, aoriwa Niyoh nen-erenh shihhoyadenhhawighdonh : ikenh arekho erenh shihhoyadenhhawighdonh nok shihhorighwagniradyh ne ken-ikenh, ne neh jitho-nikonghrayeridonh ne Niyoh.

6 Nok neh yahhothe-non dewat naondayakaweghdaghkon yaghnedekenh yaghdeyaweght ne ne aaweryendiyune ne raonhha : ikenh raonhha ne ne entre ne Niyohne t'kakonde enthaweghdaghkon ne na ne raonhha, neony ne na ne raonhha ne rorighwadadonh enseghshakoyeritshe ne ro-nonhha ne ne okho-nenh ji-nithodiyerenh jironwayadisax.

7 Ne ji-nithaweghdagbkonh ne Nowah, aoriwa ro-nini-konghradadonh ne Niyoh ne karighwaakon ne ne ji-nade-yuderyentharah ne ne yaghdeyokent arekho shekonh, wadewatkarenron watyudihhendowwe ne kaghderonghxhera, naadenrharade ne kahhonweya ne naonsahhayadako ne rao-nonghsakonh raoghwejira ; ne neh ji-nahhoden rarighwaghstenenire ne jiyonghwenjade, neony yadaonsontdeny ne yaonsayurighwadaty ne natdakwarighsyonghtsera ne ji-nahhoden ne teweghdagbkonh.

8 Ne ji-nithaweghdagbkonh ne Akwerenh, ne o-nenh shondahhonwennonke nehhaareghde ne ji-nonweh dewadonghwenjade ne ji-nahhoden ne t'kakonde ne oghnakenkeh aaye-na neghnyaennakerade yaaty-nawaghste, waghathondade ; neony eghwareghde, yaghdehhoderyendare kaniyenhenre.

9 Ne ji-nithaweghdagbkonh ok thahhanadayenhah ne jiwadonghwenjade ne rorharatstonh, ne ne thiye-nakeraghserrade akaonghwenjaya, waghonnadayen waghondaghs-kwaghronnyon enskatneh ne Aisac neony Yakwek, nejiwakaghwajiradatye ne ron ne enskatneh ne raonhha ne shakat jishakorharatstennyh :

10 Ikenh ne ~~rosax~~ ne nakanadowanen ne jiaondahhenderon, onghka yuderighwaghdeyeghdonh jikanadayen onghka ony roghson wahhy Niyoh.

11 Yadeyurihhonkoghdonh jityaweghdagbkonh ne Sarenh yadekayadyh jiyuye-nah ne senhha wakashatstenne ne jienwatkawe ne aoghnekwaghsha, neony yakonwagtkawen ne exhaah ne o-nenh shiyodonkoghdonh ne ji-nityoyenh, asekenh naonhha yughronkaonh roweyennendaseh jityaweghdagbkonh ne ne raonhha rorharatstonh.

12 Ne kady waghonny etho tyudonnihonh tyuderighwaghdeyonyonh ne ne enskat, neony ne raonhha eghniyuyanere ji-niyugt jirawenhheyonh, eghnenwatkadade ne jiyujistoghkwaronyon ne jikaronghyade ne kentyughkowanenhhokon, neony ne ji-niyugt ne o-neghsaronghkwa jiniyutkade ne ajatdatye ne kanyadarakeghkowah yaghthayekweny yayehhewe nayonrade.

13 Ken-ikenh ne ne akwekonh teweghdaghkonghtsera-konh yakawenhheyadonh, yaghne deyakoyendaonh ayak-oye-nake ne karharatstonh, nok se denghnon ne rodiyen-daonh ronwadikenh i-nonh niyore, neony ronwadinikongh-ronny, neony ro-natyadendonghkwenh, neony wahhondon-derene ne ne ro-nonhha jithihhadinakeraghserade neony dehhonnonghwenjendeghshon ne jiyonghwenjade.

14 Ikenh ro-nonhha ne ne rondon neghnikarihhdense thahhadirighwakwatho okhadennoserhenh ne ne rondenn-adisax.

15 Neony ne orighwiyu, doka ao-nadennikonrarake ne ne ehhye-nakere eghthodiyakenhonh ne neh nenro-nadesh-enneyoghne ne ne daonsahho-natkarhade-nyon.

16 Nok nonwa ne dehho-nadonghwenjonyh ne ne sen-hha akanadiyohhake, ne wahhy neh, ne ok enskat ne karonghyakeh : ne kady wahhonny ne Niyoh yaghna dehha-dehhenghse ne aonwanadonghkwe (ayairon) neeh onkwa-Niyoh : ikenh wahhy degghshakoweyennendaseh ne ro-nonhha degghshako-nadisaanyh.

17 Ne ji-nithaweghdaghkonh ne Akwerenh, ne o-nenh shahhonwade-nyenden, ronwadewendeghdonh Naisac : neony raonhha ne ne roye-nah ne karharatstonh rodewen-deghdonh ne ok enskat royenah,

18 Raonhhakeh wahhy tyuyenghdaghkonh rawenh, Ne neh raonhhatserakonh Naisac wahhy enkonwanadonghkwe ne saghnekwaghsa :

19 Waghradonhhatye ne Niyoh jirokwe-nyatserayen ne ne enshoketsko, shaden-yawen ony kenhheyatneh ; raonhhakeh ony tyuyenghdaghkonh jiroyenah.

20 Ne ji-nithaweghdaghkonh ne Aisac royadaderighstonh ne Yakwek ony *Esau* ne ne ji-niyutyerenh ne karighwaokon ne naondawe.

21 Ne ji-nithaweghdaghkonh ne Yakwek, ne no-nenh shighrenhheyonghse, ronwadiyadaderighstonh yeghnikwekonh ne shakoyenhah ne *Joseph* : neony ronwarighwane-kenny, eghro-natyadarakaratonh raodennitsherakenyade.

22 Ne ji-nithaweghdaghkonh ne *Joseph*, ne o-nenh shaghrenhheye, yaorighwisaghde jikaghson ne ne jidenwad-ekhaghsy ne shakoyenhokonhah ne *Israel* : neony shakorighwawyh ne ji-niyutyerenh ne raoghstyen.



23 Ne ji-nithaweghdaghkonh ne Oses, ne neh o-nenh onkweh shondahhadon, ronwayadaghseghdonh aghsenh niweghnidakeh ne neh ronwayenhah, aoriwa jiwahhonwatkaghtho ji-nibhaxhadiyuh; neony yahhothe-non deghni-tshanighshe ne koraghkowah ne ji-nighshakorighwawyh.

24 Ne ji-nithaweghdaghkonh ne Oses, ne ne o-nenh shaghroghseriyakhon, raderighwadekwaghs ne naonwanadonghkwe *Pharaoh* shakoyenhah ne royenbah;

25 Ne senhha ranonwese ne aaronghyaken enskatneh daonderyendakary ne raonkweda ne Niyoh, daghnon enskatneh ao-nadonnharake ne ji-niyonwesenghtserodenh ne jikarighwaneren ne ok yeyuderighwihheh yuderighwaghdentyonh;

26 Enghshakokarowanaghden ne enghshakorighwaeghsten ne Keristus senhha ne watshokowaghtserowanenh jiniyught ne jideyutstenre ne kayendaghtsera ne *Egypt*-tserakonh; ikenh ne rodewennodaghkwenh ji-nonka ne ens-hotyeritshe ne karharatstonh karighwadadonh.

27 Ne ji-nithaweghdaghkonh waghody waghaghtkawe ne *Egypt*, yaghdehhatshanighse ne rao-nak'wenghtsera ne koraghkowah: ne wahharonghyakende ne wathaghsnye-ne, jiaonwatkaghtho raonhha naah yaghdeyokent.

28 Watharihkhonkoghde ne teweghdaghkonh wahhatye-nawaghste ne jiwadennyode, (ne *passover*,) neony wathatstaradonkwaghde ne o-nekwenghsa, onwaneken ne enghshakoghdonde ne tyutyerenghdonh onkweh yakodonhonh ne kenniyaaghshakoyere.

29 Ne ji-nitho-neghdaghkonh wathondonkoghde ne ji-o-nekwenghdara nikanyadarodenh akwah jiniyught naonghwenjathenkeh: ne ne etho onderighwisake ne neghniyaon ne etho kady waadisko-ne ne *Egyptians*-aka.

30 Ne ji-nitho-neghdaghkonh ne jidekadaraseronnyon ne *Jericho* onhhetkenne donsenne wadewarenhy, ne ne oghnakenkeh nensshadehhonwadighwawenheh jadaghk onghdeh niweghniserakeh.

31 Ne ji-nitho-neghdaghkonh ne ne yaghdetyonkwedavery *Rahab* yaghdehho-nadaghriskonhonh ne neh yaghdetho-neghdaghkonh, ne o-nenh shiyuye-nah ne yontkense yekaen-yon ne skenen.

32 Neony oghnakhoden kady shekonh Aonsakiron ?  
 ikenh nense yahhonkwaderighheghse ne neh enhighrory  
 ne *Gideon*, neony ne *Barak*, neony ne *Samson*, neony ne  
*Jephthae*; nokhony ne Dawed, neony *Samuel* neony ne  
 rodiyadadokenghdy: (ohhendoneh yehhadiriwakenghs:)

33 Onghka den-yerihhonkoghde ne teweghdaghkonh  
 en-yondenshennyade ne kayanertsera, sayudenh natdak-  
 warighsyonghtsera, denseghsadentsha ne karharatstonh,  
 enkonwadighskweke ne kenghrexkowatshon,

34 Enwaswaghdon ne jiyudekha ne thikashatste, ensk-  
 onwanyakense ne ji-niyughyuthiye ne asharekowah dent-  
 kayenghdaghkwe ne jiakoyadanetskhah enjeshatstenne,  
 enskaghneghdarhon enjakotshaghnighdane naderiyughse-  
 rakonh, eghsadekwaght kentiyughkwakonh ne ronderi-  
 yughs ne ne yaghshesewanakeraghserah dekenh.

35 Tyunathonwisen yudiye-nah nao-nenhheyat jo-nat-  
 ketskwenh jo-nadonnhedoneh are shekonh; nok notyakes-  
 hon ehhen-yeronghyaken, yaghdeyakoye-nah ne naonsa-  
 yakoyadondakwaghdon; ne neh ayudonhonh daonsahho-  
 nadentshon ne senhha jiyuweyenstonh jiaonsahho-natket-  
 skwen:

36 Neony ne otyakeshon ne en-yondadade-nyenden en-  
 waderighwisake neony den-yako-naderyendakaryaghdeka-  
 nonghwakdenghsera then-yakodiyeron neony den-yonghsh-  
 enthoghseron ji-niyuneghrakwaght en-yakodironghyaken-  
 de, etho orighwiyu, senhha issy nonweh ji-nen-yawen en-  
 yetshiyadaghkwarike ony ensewadennaghskonny:

37 Ro-nonhha enhhonwadinen-yuyake, ro-nonhha den-  
 kaghswenkarorenhake denkakhaghsyonkwen, wathodini-  
 hhaghrodon ne wahhetken, wahhonwanawenthoh asharek-  
 owah wadonh: dehhonnonghwenjendeghson ne ne ji-niy-  
 utyerenh ne deyudinakarondonhahoseroghsakonh neony  
 ne kayadakeraghseoseroghsakonh; wahho-natswaden nao-  
 nadonnharake nao-nonrishendaonh, wahhadinikonghraron-  
 ghyaken, wahhadironghyaken;

38 (Ne na ne jiyonghwenjade yaghna shadeyukara:)  
 wathonnonghwenjendeghson erenh ok jiwadonghwenjade-  
 nyon, neony ne jiyunonde-nyon, neony ne jiyunatshonwe-  
 nyon ne kondiryu nokhony yunadedoghseraghrannyon  
 ne konwadiyadadaghk'wa ne jiyonghwenjade.

39 Neony ne neken-ikenh nakwekonh, ne denjondent-sha ne karighwiyuh yakenshonhah thikaribhontye-nontye-sa deyuderihhonkoghdonh jiteweghdaghkonh, yaghne deyakoye-nah ne karharatstonh :

40 Niyoh thoghseronnyaghkwenthonh ne ne senhha onkwayanerenghsera, ne ne ro-nonhha yahheghdejidewayadade ne ne yahheghdeskaghson naonsakaweyennenda-onh.

---

## CHAP. XII.

*Ne ne kaghrejaronh norighwiyu ne neh teweghdaghkonh ayako-nikonghkatsteke, nokhony aye-nikonghradokenghdi-hhake.*

**N**E kady wahhonny aedewakaen-yon onkyonhha wahhy ony dejonkwatyadadasedonh ne ne ji-niyuribhohanen ne tyonkwadakaraghstennyyh ne yonkwarighwagh-niradyh, kinyoh erenh dewaghkwit ne ji-nikonh ne yoxde, neony ne karighwaneren ne ji-niyonkwayerha jiyabhothenon dewendore ne deyonkwatyadadasedonh thiyatyonkwenidonnyaden thiyaonkwanonghwaroryade, neony kinyoh dedewaraghdad aedewadennikonghkatstade ne ne daedewarero ne na ne onkwahhendonh yonkhirighwayennyyh,

2 Jadenrharat ne Yesus-neh ne na thodaghsawe ne thoderighwaghdeentyeghdonh neony thoweyennendaonh shonkwaghsenhennyyh ne teweghdaghkonh ; onghka na enyondonnharaghkwe ne neh wahhy raohhendonh ronwayennyyh roronghyakenhonh ne jidekayaghsonde, watyadatswen ne adehhenghsera, neony yahhatyen ne jiraweyendeghdaghkonh ne raotkonnyenghtserakonh ne Niyoh.

3 Ikenh ne dehhoyadoreghdonh ne neh jiroronghyakenhonh rodaghkatstadonh ne neken eghniyugt dehhaoyenghdonh dethowennokwenh ne karighwaneraaxhera ne nyadehhayadyh, onwa neken ne densaghwishenhheyaade neony enghsyadakenhheye ne sennonghdonnyonghtserakonh.

4 Arekho wahhy thadesewadenghstonh ne ji-nonka nonekwenghsa, aedewadatsteronghse naedewaghswen ne karighwaneren.

5 Neony jisewanikonrhenhonh ne kaghrejaronh ne jinhahoden yetshiyadatyaseh ne isekkeh ji-ony nonka nexhaokonhah, Riyenhah, toghsa sakenghradenh ne raoronghyakenghsera ne Royaner, yakhony thaayadakenhheye ne o-nenh wahhy wagtserighwaghsten ne raonhha :

6 Ikenh raonhha ne Royaner ranoronghk'wa ne roda-deronghyakendonh, nokhony ronwanonghwaryakhon jini-konh ne ronwadiyenhah raonhha ne roye-nah.

7 Doka ne jonhha okho-nenh ji-nendisewayeren ensewadaderonghyakendon, Niyoh wahhy denjisewarihhon-dake ji-niyught ne ji-enskatneh ne shakoyenhokonhah ; ikenh onghka na ronwayenhah raonhha ne ranihbah ne nyaghdehhoronghyakenhonh ?

8 Nok doka yaghtensewadaderonghyakendon, wahhy ne-eh akwekonh skentyughkwah enjidewadon, ethone wahhy ne jonhha nokthiyetshiyadewedon yaghwahhy deg-hjhisewayenhokonhah.

9 Senhha eso yonkwanighshendaghkwe ne onkwawar-onh ne yonkwaronghyakendonh, neony waakhiyon rononhha ne ro-natsteristonh ne o-nonghsadokenghdikeh : yaghkenh ne senhha eso ne aedewanonghweseke ne ne aonsayonkwawenniyohhake ji-nonka ne Ranihbah ne raonikonra, neony aetyonnheke ?

10 Nok akwah tokenghske ne ne doghkara niweghniserakeh waonkhironghyakende ne radighnonderatye ne rononhha rao-nadonweshenghsera ; nok raonhha se sayakwadonghradaghkwe, ne neh aontyesen ehhaonsedewayadarane ne rao-nikonghradokenghdikeh.

11 Nok nonwa yaghdeshodironghyakenh ne nonghwa-keh nonwa akwah anyoh sho-natshennonnyh, nok rodinik onrawise : ethosane oghnakenkeh ne sondeggharon ne skennen ne kayanerenh ne sakanenhhonden ne atdakwarighsyonghtsera ne ro-nonhhakeh ne neh ne dejakodadenikonrhare ne jondaderihhonnyenny.

12 Ne kady wahhonny sewade-nontshaketskoh ne ne desewanontshendonnyon, neony ne yokenhheyonh ne sewakwitshaokon ;

13 Neony se-nihhahhakwarighsyh enkarihhonny ne sewaghsikeh, onwaneken ne ratshinokaghtha enhhothah-harakwaghde ne jiyohhade, nok senhha ke-nonwese naon-sahhayewendane.

14 Sewaghnonderatyeght ne kayanerenh jonkwedakwekonh, neony ne kanikonghradokenghdy, yahhonghka ne onkweh ne yaghtaonwakenghsere ne Royaner :

15 Jatste-nyaronh se-nikaen-yon se-ninikonrarak onwa neken kaneka ne onkweh enthoseronnenghde ne raodenrat ne Niyoh ; onwa neken kaneka nenwatdeghradeghyaron nyutdeghratskarade-nyon o-nikonghraxhadane ne densanikonrharen, neony ne enkarihonny yutkade ne enjakohetkenghde enjakodaxhade ;

16 Onwa neken kaneka en-yerighwaneraka kanaghkwa, nedenhens nyaghdeyakoyanere nonkweh, ji-niyught ne *Esau*, raonhha ne ne jo-nhoghskwah ne wakon wahhadenghnon ne ji-nihoyanerenghsere ji onkweh rodonhonh.

17 Ikenh oghnakenkeh nenwahhodokenghse ne ne ji-naawen, ne o-nenh ireghre aaye-na ne kayadaderightsera, issy yehhonwayadontyonh : ikenh yaghdehho-nakdatshe-nyonh ne aonsahhodatrewaghdon, ethosane nenne waghresake wahhadennikonraren ike-ne ne raokaghsery.

18 Asekenh wahhy yagthiyehheroh ne ji-nonka tyunonde ne ne ayudonhonh yayurooghdon, (kenniyaoyeren,) neony ne ne enwatshaaghdon ojire enwadon, yakhony ne ji-nonka T'kahhonjyh, neony naghssadakonh, neony jidey-uweradaseh,

19 Neony ne jiyurakaghre ne jothonrakwadon, neony ne yakowennoghtha ne owennaakon ; ne neh ji-nikawennoden ne ro-naghronden orighwi-yujy ne ayerighwanendon ne nowenna ne ne yaghshekonh oya ne thaonsahhonganadatyase :

20 (Ikenh yaghdehhodikwe-nyonh nok-o-nenh ji-naondahhodyeren ne ne ji-nahhoden ronwenninyh, Neony doka ne ji-niyaweda ji-niyught ne karyu ne kenniyakayere ne jiyunonde, t'kakonde enkonwanen-yuyake, nedenhens enyakoase denkanharane ne dart enwadon : (anyoh kayenkwire :)

21 Neony ji-nadenwadennon-yanighde ne jien-yeken, ne ne Oses rawenh, Ne nyadewakde ne dewakadonnha, renron nokhony wakyadishonghk'wa :)



22 Nok ne jonhha wesewawe ji-nonweh niyo-nonde ne *Sion*, neony ne ji-nonkadyh ne tho-uadayenkowah ne ronnhonweh ne Niyoh, ne karonghyakeh ne *Jerusalem*, neony ne yaghtiyayehhewe nayonrade ne radironghyakeghronhokon,

23 Ne neh jikentyughkwakwekonh kentyughkwakweniyu jiwatkennison nokhony kentyughkwadokenghdy ne ne tyutyerenghdonh onkweh yakodonhonh, ne neh nenkaghyadon ne karonghyakonh, neony ne Niyoh ne denghshakoyadoreghde akwekonh, neony ne kanikonghraakon ne ne thonnonkwedayery ne skaweyennendaonh,

24 Neony ne Niyoh ne enghshonkwarighwakwadakwaghse ne ne ase denjidewarihhonden, neony ne rao-nekwenghsa ne denghshonkwatstaradonkwaghde, ne ne senhha yuyanereshon ayakwadatyade ne ji-niyught ne *Abel*.

25 Jatkaghtoh nethoh ne ne yaghtadeghjhisewawennotkawenh ne neh eghjhisewadatyaseh. Ikenh doka ne ro-nonhha yaghtaonsahhadinyakenne ne onghka denhhonwawennotkawe ne neh rodadyh ne onghwejakeh, yaghky-na ne senhha deyaweght aonsedewanyakenne, doka erenh endeweghde ne raonhhakeh ne ne shonkwadatyaseh karonghyakeh tyuyenghdaghkonh :

26 Ne neken ne raowenna ethoghkeh den-yudihhendonwe ne onghwenja : nok nonwa nenwahharharatste, wahhenron, Shekonh enskat yaghne ok Thadaakkarenron ne onghwenja, ok shaden-yawen ne karonghyakeh.

27 Neony ne ken-ikenh nowenna, Shekonh enskat, wakeriwadade ne ne erenh enkahhawighdonhhake ne ken-ikenh karighwaakon ne neh deyudihhendonhhonh, ne ne ji-nahhodenhokon ne kaghson, ne ne otyake ne ji-nahhodenhon ne neh ji-nahhoden ne yaghdeyukwe-nyonh dayutkarenronke ne enwadon en-yudadenre.

28 Ne kady wahhonny ne endewaye-na nekayanertsera ne nahhoden ne ne yaghdeyaweght erenh akaghkwidon, kinyoh youkwayendak ne kendenron, ne ayonny ajhideshowyudenghse dajhidewaghsnye-ne ne Niyoh aondaghjhidewanikonghrayeride ji-nayonkwayeren ajhidewanoronghkwe neony ayonkwaderighwakwarighsyon kaghderonghxherakonh.

29 Ikenh nonkwa-Niyoh ne na enshaghdondaghkwo ojire.

## CHAP. XIII.

*Yutkade yakokonghsanawenh, ji-niyught ne adade-noronh,  
ne ne yakonnhiyuh.*

**N**IIHENNYOH dewadadekenhokonhah desewadade-noronghk'wak tyutkonh yurighwadatye.

2 Toghsa yetshinikonrhenh ne thiyakaonghwenjade yetshiyadeweyendonh deyetshighsnye : ikenh ne neh ot-yake dehhonwadighsnyeonh yeronghyakeghro-non ok thadeyaonghnihare.

3 Yetshiyeghyarak ne neh ye-nerenh e-naghskwa, ro-nadade-nhighbennyh ro-nadatnerenh, neony ne nahhoden enhhodironghyakende enhho-naderaswaxhade yadenhhondonnhakary, shadeyught shaden-yawen nyadesewayadyh ne oyerondakonh.

4 Ne Nyako-nyax ne na ne yutkonnyenghst ne akwekonh, neony ne yaghtaninakdahhetkenghde : nok neh oya ok jakotsteristonh yerighwaneraakhon kanaghkwa Niyoh naah denghshakoyadoreghde.

5 Kinyoh ne sewaghtharaghkwenhhak ne yaghdekayadade ne kanosshaghsera ; neony sadade-nikonghrayeridonhhak sanikonghriyuhhak ne ji-nahhodeshon sayen : ikenh rawenh wahhy, yaghtonwendonh Thakon-yadondy, nendenhens akon-yaghtkawe akon-yadondionweh.

6 Ne kady ne ne aondon ayonkwadewennadakarideke, Ne Royaner ne na rakye-nawase, neony yaghdeyaweght Aonkderonne oghkiok nighronkwedodenh ne ji-naakwatyerase ne iighneh.

7 Yetshiyeghyarak ro-nonhha ne ne yetshirighwakwadakwase, ne ne ro-nonhha yetshiyadatyaseh ne raowenna ne Niyoh : ro-nonhha wahhy radighnonderatye ne teweghdaghkonh, dese-niyadoreghthak ne jiyeyuderihhokde ne ji-nadehhodightharakwenh :

8 Yesus Keristus ne shahhayadat ne thedenreh ony ne kenwende, nokhony ne ji-niyenhhenwe.

9 Toghsa ne yutkadek ne serighwenhshawisek ne aaghs-  
 sherighwakeghronhaghse ne nyaghkaneka ne nakarigh-  
 waghniaratste. Ikenh ne wahhy yurighwaweyenstonh ne  
 ne adonnhets nenkaweyennendaonh yutshenryonh ne  
 kendenron; yaghtakade ke ne wakon, ne ji-nahhoden  
 ne neh yaghtaondonghradaghkwe ne ne nenrodiyenda-  
 onnen enrodiye-naghne ne ethoh.

10 Yonkwayen ne jiyeyadaraghstha, ji-nonweh ne  
 yaghdehhodirharats yaghdeyuweyenstonh ne naadike ne  
 ne radiyudenghse ne jiwaghskwahhere.

11 Aoriwa ne oyeronda ne ken-ikenh kondiryu, ne ao-  
 dinekwenghsa ne wahhadihhewe ji-nonweh ne nikanakda-  
 noron ranihhakda ne rajihhenghstajighkowah aoriwa  
 karighwaneren, ne ne watshaaghdonh nyaghdekayadade  
 ne jiyudekanyon.

12 Ne kady wahhonny Yesus ony, ne ne aondon aon-  
 saghshakoyadadokenghdighste ne onkwehhokon aarade  
 nakwah raonhha rao-nekwenghsa, roronghyakenhonh ro-  
 daghkatstadonh yaghdekayadade ne kanhohhowanenh ne  
 jiyudenhenghrakaronde.

13 Ne wahhonny kinyoh yedewaghdendy ne raonhha-  
 keh yaghdekayadade ne jiro-nadekadanyon. (rodinadayen,)   
 dewaderighwenhhawa ji-nahhoderighwaeghsten.

14 Ikenh ne kenthoh yaghdeyonkwayen, nayurighwa-  
 datye nakanadowanen, nok yakwesax enskat ne naon-  
 dawe.

15 Ne wahhonny kinyoh raonhhakeh eghjhidewenne-  
 yonh ne aghjhidewanendon Niyohne en-yurighwadatye,  
 ne yeskawenniyu, ne naonsakanenhhonden ne dewaghs-  
 kwendakeh danghjhidewanonghweradonhheke ne ji-non-  
 ka ne raoghsenna.

16 Nok ne ok ne yuyanere ji-naedewatyere neony de-  
 wayadarasek toghsa yonkwanikonrhenh: ikenh ne neken  
 eghniyught ne ronwenneyonghs ne Niyoh ne na thawery-  
 endiyughs.

17 Shewennaraghk'wak ne yesarighwakwadakwase, ne-  
 ony eghdakeh sewadadonnihhak: ikenh ro-nonhha wahhy  
 rontyeghwadany ne sewadonnhets, ne ne ro-nonhha ne  
 t'kakonde en-yondadon enwe-neghstaghkwen, ne ne aon-  
 tyesen aondon eghnaadivere ne naondonnharen, nok yag-  
 hden neo-nikonghraxhadane: ne neh yaghthasadonghra-  
 daghkwe.

18 Dakwaderennayennihhek : ikenh ne yonkwadewen-nodaghkonh yonkwayen ne weryendiyuh, orighwakwekonh yakwanonwese ne nayakyonhheke aondayonkwari-ghwayerike.

19 Nok wakwennidenghden ne senhha yuweyenstonh ne ne eghnaese-niyere ne ken-ikenh, ne ne aondon ne thaonneneh Aonsakwayeritshe.

20 Nonwa ne raodenrat ne Niyoh, ne ne shekonh segh-shonkwahhewyh ne jirawenhheyonghne Eghjhidewayaner Yesus, ne ne kowanenh Ranonghne ne deyudinakarondonhah yaden-yuhhetste ne o-nekwenghsa ne ji-niyen-hhenwe yaghtthiyaondokden dendewarihhonden,

21 Ensyaweyennendase akwekonh ne kayudenghseriyuh ne ne ji-nenghtshatyerase ne ji-nithanonwese ensayudeke nisetserakonh ne ne ji-nahhoden we nakwah ne ok nenthaweryendiyughseke ne jidenghjhisewakanerake, ne denhharihkhonkoghde ennharihkhonny Yesus Keristus; raonhhakeh eghjhijonwesaght ne ji-niyenhhenwe neony ne jiniyenhhenwe. *Amen.*

22 Neony wakwennidenghden, dewadadekenhokonhah, jadaderonghyakent ne owenna ne kaghrejaronh : ikenh Yekwaghyadonnyh wahhy ne isekeh toghkara nikawennakeh.

23 Jaderyendarak ne ne onkwadadekenhah ne *Timothy* nense shadadewenniyu ; entyake-ne, doka nenweah entre, Entkwatkensehha.

24 Teshe-nonghweronhhek akwekonh ji-nikonh ne yesarighwakwadakwase, nokhony akwekonh ne rodiyadadokenghdy. Ro-nonhha ne *Italy* radideron deyetschinonghveradon.

25 Kendenrat aeseweseke akwekonh. Awent.

† Yehhonwaghyadonnyh ne *Hebrews Timothy* yehhoghyadon *Italy* nonweh.














AYER

3A

571



